

胥溪朱氏文會堂詩鈔

全函

浙江圖書館



朱君美鏐前官滇南蒙化廳經歷
余視學時曾識之尚義氣頗有肝膽
其本廳張丞雲屏病歿身沒蕭然
母老子幼孤苦無依美鏐為之拚擋一
切送其靈櫬眷屬歸里彼時林久忠
總制滇黔佳其義亟於拔之乃於丁母
憂回浙分觀纂輯詩鈔裨合族翰墨
不致散失益去為有心人故并識之

梧江



咸豐元年刊鐫

文會堂詩鈔

胥溪朱氏藏板



282122

164年法藏

大會

浙江圖書館

圖書

浙江圖書館

浙江圖書館



胥溪朱氏文會堂詩鈔序

昔人有言莫爲之後雖美弗傳是以古之著作藏之名山必曰傳之其人前人心芒所發難必其不湮其所望於後人者意良殷心良苦矣至後裔傳其祖先尤非授受淵源所得而擬也吾先人自婺源遷胥溪歷數百年書香遞衍詩文著作代有傳人然自專集世守外其散失於鼠齧蟲殘雨零霉爛至蕩焉無存者何可勝數而幸有存者不及早輯之其不至同歸於盡者幾希矣歲乙酉瑞椿解組回里悉族孫美鏐訪羅族中前輩詩文遺橐瑞椿極嘉其志而愆愆之間二年所集已八十餘

種且手錄副本各加小傳非特先人著作之精神垂於不朽而其志篤其力勤更不可及也嗟乎弓冶箕裘流傳易失栝棬書策手澤難留嘗見前人著述所貽洎時移代易後人不知爲何物而弁髦視之者甚至棗梨零散且以覆瓿何況墨蹟之存留乎此不能不瞻前顧後而感慨係之矣珍重前徽網羅散失美鏐其真吾宗之健者哉道光七年丁亥四月瑞椿謹序

思深哉族子美鏐之克傳前人也編其詩署其號胥溪者吾宗由新安始遷之里也文會堂者二世祖於斯築堂之題額也原其里別異支也溯其堂誌祖澤也凡子

孫欲顯揚其祖宗性也性也者子孫與祖宗一脈相聯屬也性生情情生意意生思思生文文也者出於身昭於世而因以成其名也人莫不自愛其身愛其身未有不愛其名也愛其名未有不願顯及於祖宗也況祖宗之本有其名而不爲揚之乎昔人有言編刻遺藁與掩骼埋胔同其仁況其在一本乎但藏其身後之形不顯其生前之苦心又豈知骨有朽而名不朽乎吾宗自元以來五百餘年家世耕讀不乏詩人顧或如石子曼卿之不能自惜或如鼂君成之不爲人知其有專集貽後人者寥寥數家而已網羅散佚厥維艱哉後賢輩出何

居乎獨讓美鏐一人成此志也昔梅淵公有梅氏詩畧
錦琮宰宣城因其後嗣重刻而爲之序顧梅氏兼采存
者此則專錄歿者其用心益可見矣嗟乎以詩傳人以
人傳詩無非後人欲其前人之名之傳於世也固非自
成一家言者比也又非選家雜而集之者例也當世君
子尙其鑒諸道光八年戊子秋八月錦琮謹序

丙戌仲夏從子美鏐入都出文會堂詩鈔數種云將徧
徵族中各集以成一家言嗟乎吾族自婺源來代有傳
人而著述之湮沒不知凡幾嘗讀笠亭族祖選明人詩
續鈔僅收南野公以次若干種然當日所存南野幽蘭

等集今亦蕩焉無存卽近時素有詩名諸公或後嗣式
微或遠方流寓揆求遺集十不得一前歲戊辰方增以
憂歸里曾采族中詩數種冀哀一集泊夫服闋供職未
及葺事茲閱是編其實獲我心者乎美鏐是冬回里今
春方增奉

命視學江左適是集成郵書求序因於襄校之暇尋繹
其緒知其自族中徧訪并徵諸邑之文獻殘碑斷簡幾
費揆羅閱四年凡雜著外得詩集八十餘種數易橐而
始成磨磨炳炳闡潛德之幽光豈特成一家言并足備
輶軒之采焉道光戊子九月朔方增謹序於江陰使署



浙江圖書館

凡例

一集何以名文會始遷祖 勉軒公元元貞間任嘉興路海鹽州主簿卒於官遂占籍焉二世祖 坦庵公廬陵解組後築堂胥溪額曰文會後嗣繇延皆公系也故彙編族中諸集仍繫是名以誌祖澤同宗異支槩不收入

一選擇家或因詩存人或因人存詩因詩存人自應博采因人存詩祇登一二詳畧各有所取

一吾宗自有明來名人輩出有專集刊行者尤慎選擇至遺槁零落必極意搜羅竊附發潛闡幽之義

一各集首冠小傳畧誌梗槩集內有題詠族中事實必詳加采擇庶無專集者藉之可攷

一凡各種詩集名目均載是編至經史雜著另輯藝文畧書畫錄記之其未見者望族中廣爲按尋以補不逮尤所厚望也

一著述世裔族眾難稽編首節繪一圖自一世至十世止在十世後者小傳內書明某公第幾世即可查核至欲考世次之詳則固有譜牒在

一選擇家每以編年爲序茲乃彙錄一家言故以世次不以年次同輩者序齒但族派繁衍往往越百

年而有兄弟行者其於易代之際自宜分別界限以清眉目今第一卷悉錄明詩第二卷起錄

國朝詩前後各以世次

一所采之詩或得自某處或現存某處均誌明源本一族人流入方外詩附卷末閨秀能詩者另錄一卷一是編集於乙酉春仲至丙午冬月歷二十二載七易槁始輯成於滇南蒙化官舍釐爲八卷計一百三十三人詩九百二十八首

一庚戌二月奉諱回籍悉族叔

謙受

復於原槁外掇

得數十種俟其纂成卽刊續編若干卷於後

一、...

館

書

圖

江

浙

胥溪朱氏世系圖

始遷祖順

茶院公十二世孫字文禧號
勉軒元嘉興路海鹽州主簿

銘字維新號
坦庵江西

廬陵

懋卿

字勉之號悅山
湖廣彬州學正

光祖字勝宗

原貞字養

縣令

正號松居

瓊字欽禮
號閱耕

銳字用賓
號退庵

溥字文博號
菊軒庠生

瀚字文海

洪字文濟號愛蘭
歲貢授司訓職

鈍字克磨
號魯庵

漢字天章號南野
江西藩司都事

椿字永年
號樗庵

環字廷儀
號東溪

珮字廷和號北溪
江西藩司都事

世系



松字喬年
號南谷

瑞字朝玉號
可六庠生

璞字廷采
號可三

桂字大年
號北巖

嘒字朝華號三
峯增監生

楷字良則號
鄰桂廩生

瑋字廷
瑞

記字廷耀號龍
沙附監生

栻字良器號西
洲兩舉鄉飲

玘字廷璽號
龍溪監生

梓字永良號東
庄王府典膳

珊字廷珍號西園江
西贛州府通判

浙

錢塘蔣勤施填諱

胥溪朱氏文會堂詩鈔卷一目錄

尚胥里派第二十世孫美鏐謹纂

竹軒公一首

愛蘭公三首

南野公三首

南谷公六首

西洲公三首

東溪公二首

可六公三首

龍溪公五首

海涯公三首

泰室公一首

勵南公十四首

元之公十七首

遜齋公八首

葵愚公二首

穉韜公三首

鹿巖公二首

循默公十一首

白岳公十一首

令回公六首

大彰公二首

長白公十二首

館虞華公一首

茲邁公四首

浙江圖書館

胥溪朱氏文會堂詩鈔卷一

尙胥里派第二十世孫美鏐謹纂

竹軒公小傳

公諱瀚字文海號竹軒勉軒公八世孫伯仲三人分
三支兄菊軒公諱溥明正統乙丑禮部采知府楊瓚
言學校始設附學生吾族之博青衿者實自公始弟
愛蘭公詳本傳公少贅沈氏勤生不匱志未竟而歿
子若孫抗志承業科第奔世皆公
之蔭也詩一首存勵南公集中

秋日感懷和天章弟元韻

幽襟瀟洒奈愁何壯士空懷擊筑歌金井風寒桐葉滿
碧溪霜老荻花多三更夢醒聽鴻雁十載身閒隱薜蘿
指顧琴臺滄海上知音依舊許經過

愛蘭公小傳

公諱洪字文濟號愛蘭勉軒公八世孫本支支祖明
成化戊戌歲貢議敘訓導公自幼天資穎異事母以
孝聞舉稅長閭閣皆帖服成化丁酉荐饑公先後捐
粟入百石助賑循例得議敘他如修學校濬河渠咸
著成績時張黃門方洲先生以諫諍罷職閒居與公
為詩酒之會最為相得公謁選入都黃門贈芳郊別
意圖士夫賦詩餞之一時推為風雅著有幽蘭集遭
兵燹散佚縣令族祖炎選明人詩續鈔於南野公詩
小序內僅以父老傳聞者錄入兩聯以未見全
豹為憾今校勵南公集中存此兩首敬登入焉

留別友人

與君晨夕見雄才握手何堪短櫂催遊子飄萍空躑躅
故人折柳共低徊離情今夜看殘月歸路明朝正落梅
乘興相將重訪戴一帆秦海帶雲來

与別路秋柔
生碧草故園
歸去正黃花
筆意同

西崖野眺

憑闌一長嘯。四顧景蕭蕭。野曠登臨快。峯高睇眄遙。人
家藏樹杪。雲氣接山腰。搔首將誰問。孤蹤寄沅寥。

南野公小傳

公諱漢字天章號南野勉軒公八世孫江西布政使
都事少與布衣西邨翁結社倡和在東濱諸老之先
嗣以宦遊不獲與瀛洲社有舟名水雲亭西邨賦詩
云水雲鄉裏水雲亭萬頃煙波一葉萍春雨卷簾孤
鳥白夕陽吹遂數峯青南宮去後閒虹月東海今還
有客星聞道蓴鱸秋正美放歌時復下雲汀蓋借以
寓意重望其歸也胥溪宗譜自六世祖閱耕公於明
永樂壬寅纂成後已九十餘年公於正德乙亥重輯
之著南野集選
入續明人詩鈔

自禹城至歷城宿百花橋舊館

長征日復日。我馬已元黃。大道通齊魯。遺蹤問帝王。憩
林看棗熟。近水覺蓮香。偏愛明湖勝。重來興更狂。

秋日感懷

回首雄心只幾何。勞勞還唱五噫歌。宅邊楓槿曉霜冷。
江上蒹葭秋水多。尺素忽來驚落葉。一身無著比縣蘿。
每懷舊日登臨處。擬約同心載酒過。

再宿阜城待月

迢迢漢阜月。連騎此重來。秋色荒郊盡。斜陽曠野開。難
聞嵇叔操。更負庾公栝。故國三千里。空教客夢回。

南谷公小傳

向字從
曠字生虫

逼肖

公諱松字喬年號南谷勉軒公九世孫懷藏碩德疑
重不華足為鄉閭中楷範充拓前業好賓友太邱道
廣進見者門無虛日老愈豪放雄談世故氣軒軒出
鼻吻莫有能抗之者著喬年詩存已佚僅附六首於
勵南公
集中

禹城雨阻

蕭條荒邑閉驟雨溼輪蹄日暗風逾慘雲濃天更低家
園頻入夢客館屢畱題料理登山屐明朝又適齊

途中苦熱

逢暑嗟行役炎威竟莫當但看紅日杲絕少綠陰涼我
豈因人熱愁偏與夏長北窗思故國高枕臥羲皇

過涿州

涿鹿傳名郡。嚴城據上游。襟喉通四塞。形勝甲諸州。曼
嶂青螺聳。危橋碧澗流。天閭看不遠。縹緲見龍樓。

雨後漫興

西風瑟瑟雨餘天。白苧歌殘思黯然。極浦蘆花堆似雪。
遙山螺黛淡於煙。征人塞外悲芳草。遊子湖中泛畫船。
一望秦溪新水漲。寒生十里碧涓涓。

過聞琴橋口占

雅音久矣杏河濱。猶拂東郊遊騎塵。登眺無窮懷古意。
往來誰問鼓琴人。荒城樹老蕭蕭暮。野渡花殘寂寂春。
可歎至今橋下水。空餘白石響鄰鄰。

秋日有感

泉石蒼涼繫此身。壯遊無地歎迷津。青萍早欲酬知己。
綠綺悠然寫古人。徑滿蒼苔多為嬾。庭餘秋色未全貧。
澆愁沽得前邨酒。索醉閒吟景物新。

西洲公小傳

公諱棫字良器號西洲勉軒公九世孫美鏐九世本
生祖也兩舉鄉飲賓修顙偉幹喜包容守謙抑敏於
辨物勤於治事居恆為善足以感人陳灣山遷祖墓
兵燹後山界被侵公清理兆域立產歲祀先世譜牒
失傳明嘉靖甲辰婺源博士原靜公諱暨輯宗譜因
有諱某仕海鹽州主簿者後無世系遣宗人齎書來
訪公相與訂證墓圖世系三次修輯家乘支分派別
朗若列眉今美鏐所藏鈔本舊譜蓋公之定本也著
幽蘭集選入續明人詩鈔○屬南公集中載愛蘭公
有幽蘭集今續明人詩鈔指為西洲公集恐笠亭公

傳聞之
誤也

遊山寺

興發出門去。飄然凌遠峯。深林漸歸鳥。高閣忽鳴鐘。隨
月穿幽徑。褰衣倚短筇。喜聞開士法。一鉢可藏龍。

秋日溪上雨中偶作

黃葉滿樵徑。幽溪橫釣船。片雲生鳥外。飛雨到鷗邊。流
水汎不已。秋光清可憐。偶思濠濮上。為誦漆園篇。

山中友人別去

雲際一帆開。舟逐飛雲去。雲飛不歸來。悵望雲深處。

東溪公小傳

予青山互古
今一省曰妙

雲鎖句練
字法

公諱環字廷儀號東溪勉軒公十世孫少代父掌賦
稅遂廢舉業勤於治生家益饒裕課弟極嚴故北溪
公由名諸生出仕江西布政使都事可謂不負其教
矣工詩明人詩續鈔於南野公詩小序內摘錄兩聯
亦以未見全詩爲憾今於
廬南公集中鈔入兩首

登秦駐山

書

駐蹕於今不記年芳蘭繞墓劇堪憐
氣鍾赤帝金難厭形遁元夷石漫鞭
望遠未能窮碧海憑高何處問青天
咸陽宮闕成餘燼愁聽猿啼一島煙
岿巖巖翠嶂漫攜筇雲鎖山腰失眾峯
絕島怒濤騰鞅馬古祠衰草咽秋蛩
西秦祚不傳三世東岱松猶識五封
爲語登高能賦客好憑樽酒問遺蹤

可六公小傳

公諱瑞字朝玉號可六勉軒公十世孫庠生性敏嗜學凡子史經書鮮不漁獵雖寒折膠暑鑠金不少廢著清溪吟集明天啟辛酉春仲孫勵南公跋和先世詩畧云余族自婺源來代多詩人俱有成稟惜經兵燹散佚惟余祖可六公考海涯公兩集猶及見之後亦為祝融所燼不傳於世今將幼時熟習者追和數章附以元作使後之讀其詩者雖零紈斷素亦以見先人遺澤云爾

秋窗

縈迴谷水日漫漫。歎息雄襟逐去瀾。征雁北來雲影落。
 愁人西望夕陽殘。秦書十上裘將敝。齊客三歌鋏罷彈。
 幾夜秋風叢桂老。小山應憶舊時壇。

登舟

攜笈登舟去。風吹五兩輕。烟波迷遠道。萍梗寄離情。鴛
水先生里。平江霸國城。鳴舷頻極目。浪急傍山行。

除夕感懷

塵夢逐迴輿。流光疾太虛。獨然今夜燭。仍照舊時廬。意
豈因人熱。狂難與歲除。玉梅春早透。紙帳近何如。

龍溪公小傳

公諱珙字廷璽號龍溪勉軒公十世孫國子生庠生
族叔俎莘藏公小像幅中圓領神采奕奕自題贊曰
菲才百年多病自幸改元得起有歲寒之節操而以
松竹梅爲心友有晚景之亨嘉而以詩書楊爲夢友
不飢不寒守命勿謀不貪不妒到老卽休噫嘻茅店
散處篋衣紗巾日與逸士詩酒陶情如斯而已矣圖
後附詩係公親筆亟
鈔入以比吉光焉

文會堂言金 卷一
贈陸紹泉

心欽醫學著粉鄉。陰德緣知衍慶長。濟世直同良相手。
探懷真有活人方。杏林實茂春無價。橘井泉甘雨有香。
自是仁功能及物。百年歌介紫霞觴。

西湖

一別西湖廿載前。重來共泛缺瓜船。六橋柳色通元觀。
十里荷香接玉泉。懔懔精忠瞻武穆。悠悠清節憶逋仙。
山光水色看依舊。弔古蒼涼夕照邊。

送陳心齋分教上海

斯文一脈重儒官。此去心齋得古歡。日暖泮宮陳俎豆。

春深海國長芝蘭。百年禮樂門先入。兩字功名研尙寒。
莫道才高淹驥足。嘗新苜蓿許堆槃。

祝三峯兄八十壽

明隆慶六年壬申十月十三日

朝廷大禮尊鄉飲。齒德居然列上班。屋對青峯瑤草長。

溪環芳樹碧雲閒。喜增范研登科第。歡舞萊衣藹笑顏。

曲奏紫芝開錦譙。壽卮滿酌映南山。

三峯公諱輗字朝華增監生鄉飲介

賓志乘作歲貢誤家素封好施與明嘉靖庚戌荐饑
傾廩以賑悉焚先世遺券三黨貧者咸賴舉火自奉
儉約家祭必誠訓宗族以孝友人多目爲長者子若
孫聯翩鵲起半登仕籍洵爲善降祥宜其食報無窮
也敬附識於此

贈陳海暘

特達高人嬾出門，悠悠富貴更何論。
頭顱如許方游泮，襟韻誰同且灌園。
滿目林巒童埽徑，半窗風月客忘言。
青天絕少纖雲染，大白新浮盡一尊。

海涯公小傳

公諱簾字期辨號海涯可六公支十一世孫庠生著海上閒散叟集見勵南公集中

秋窗卽景

琴書浪迹幾春秋，望遠閒登百尺樓。
浮白方雄還學劍，草元未就獨披裘。
庭栽松菊開三徑，門掩蓬蒿臥一邱。
知己天涯何處是，相攜明月曲江頭。

涉江

萬里空無際。扁舟浩渺閒。塞雲開鐵甕。雪浪湧金山。擊楫純鉤嘯。停橈綠綺閒。漸看淮海近。西去有重關。

晚次平陵

瘡馬平陵道。斜暉照一鞭。役車隨綠雨。歸牧帶青煙。隔渡羣峯出。臨城眾壑連。解鞍相與約。重往探珠泉。

泰室公小傳

公諱學顏字榮峯號泰室三峯公支十二世孫明嘉靖己酉年十三入學辛酉科舉人乙丑成進士吾族自有明來科第甲一邑舉孝廉首長湖公進士則自公始任潛山令邑素難治公蒞別驛傳宿弊條陳宜興革者十二事宋栗菴中丞薦其才未及行取以事左遷廣東雷州府同知時公以父祖在堂抽簪歸隱承歡養志二十餘年與騷人韻士倡和無虛日惜傳稟無存族叔俎莘藏西洲公桃源圖後錄此詩字法

秀勁絕倫因記顯末於右。左遷句注明制科甲出身縣令以行取得科道爲升擢外轉丞倅卽左遷也。不以品級論。

題曾叔祖西洲公桃源圖後

西洲主人朱家翁。清標邃養無懷風。主人一去二十載。洲前芳草空成叢。冉冉丹青開卷冊。煙雲頃刻生几席。有子若孫世寶之。羹牆如覩前人澤。椒館光儀不可親。桃源仙路幾經春。南陔華白詒謀遠。北郭松青入夢頻。君不見東家籬。金侈十萬平康一笑成。虛幻又不見西鄰羅綺白面郎。壁間醬瓿覆青箱。君家種德亦云久。翁生獨蚤吾偏後。流水桃花何處尋。新詩題就悲人心。

勵南公小傳

公諱學經字子正號勵南可六公支十二世孫舉鄉
飲賓公性沈靜讀書一再過終身不忘十歲通五經
以風疾不克應試神遊物外與胡孝轅謝洪伯姚叔
祥諸先生結詩社嘗述祖父可六公言訓其子曰讀
書學聖賢須以靜心爲主心靜則理明理明則詞達
德行事業一以貫之斯言願汝寶諸平居敦友愛喜
周卹著小隱吟草四卷仍
孫庠生族叔謙受藏於家

古意

青山互古今白雲自來去
高人意何閒獨立花開處
酌泉取其清玩月取其潔
願將此中情以勵我之節

秦駐山懷古

突兀秦駐山日夕暖雲氣
香骨生芳蘭采藥人歸未

詠梅

冷淡月中梅。落落高品格。我亦同此情。願與共清白。

客中有感

獨立蒼茫萬象呈。壯心豈與利名爭。閒觀月影忘塵慮。
靜聽泉聲遠俗情。白髮尙憂家計淺。青燈有夢客心驚。
飄零時事頻搔首。我欲漁樵過此生。

游淨業寺泛舟湖中小酌

金繩晃耀開法藏。輝照雷峯萬干狀。三秋霞散殿庭旁。
紅樹青林絢疊嶂。壯哉拾級上佛樓。佛樓反出眾峯上。
俯睇雲煙飛半空。一鏡湖流移畫舫。矧復同人曠所談。

傾樽倒飲興猶壯。日斜歸去艣輕搖。清波門外聽漁唱。

海上獨步

曳杖出東門。蒼茫俯大海。長風萬里來。波濤忽相匯。回顧伯牙臺。知音渺千載。撫懷今古間。藏器以自待。

詠雪

凜冽生夜寒。雪花飛積嶺。楸檜煨空齋。門關無人打屋角。肥梅花。窗前瘦竹影。不見古袁安。僵臥山中靜。

庭前桐陰滿地感而賦此

碧雲四合涼生嶺。秋窗陟落銀河影。照徹幽閨人未眠。夜深寂寞看金井。十二闌干獨自憑。漏聲斷續良宵永。

紛披閒觸柰愁何。悵望伊人頻引領。不翦青珪作戲嬉。
漫題錦字思邀幸。此樹曾教集鳳凰。此身那許成萍梗。
低鬟重與擣寒衣。灑灑玉露侵肌冷。

擬白樂天贈江客元韻

沙鳥遠依雲外樹。江樓倒映水中天。斜陽一曲梅花笛。
燕子磯邊欲放船。

秋夜不寐

秋氣一天橫。秋聲四壁鳴。夜長嫌夢短。寒重覺衣輕。酒
意隨燈淡。詩情傍枕生。小窗人不寐。起看月三更。

客途卽景

真境說得
出便是好詩

頻年苦奔走。歲月幾經秋。江月寒無色。山雲凍不流。一
燈千里夢。孤客五更愁。歸權何時返。生涯拙我謀。

寫意

臨事無疑閱歷深。何須世事問升沈。一身豪放空天地。
雙眼豁開視古今。濁酒常爲既醉飲。好詩時爲不平吟。
夜深拔劍發長嘯。立志豈堪冰雪侵。

病起遠行感而賦此

寒濤飛處一帆收。日暮蒼江遠客愁。老去壯心悲伏櫬。
病來瘦骨強登舟。天涯望斷驚征雁。世事空教問宿鷗。
荏苒年華嗟莫及。茫茫獨自向中流。

元之公小傳

公諱學淳字文寰號元之三峯公支十二世孫明萬
歷丙子科副貢生父存峯公諱篚萬歷丁丑歲貢南
直青浦縣訓導公少善吟詠推重文壇廣文族祖光
暄向藏詩橐一冊跋云此橐每葉有朱氏元之印而
不書名心竊疑之嘉慶辛酉夏杪偶於書肆見弄月
軒橐上署萬歷丙戌朱學淳元之父書則公諱在焉
筆蹟固相符合乃知橐內青浦學舍諸詩為公隨
任時作更無疑義願世寶諸茲采其尤者於左

青浦學舍馮岱宗楊景南過訪

擬駕元亭問字車
檐花落盡酒杯疎
德星夜聚青城裏

來向山窗聽讀書

浙

白繡毬

枝上玲瓏玉
地下玲瓏影
酒醒夜開門
月落空階冷

余有句云
雪滿庭深入
夜閉門錯作

月明看之是

夜闌門鎖
此意
月明看之是

別友

酒酣歌罷片帆斜
君去天涯我返家
薄暝空山風雪靜
獨留明月照梅花

早春篇

江南春意早
吳苑花信先
入春無十日
柳條碧如煙
妾家江北住
嫁作江南婦
但望春先來
又愁春先去
春來心暗驚
江南江北總關情
妾顏正及桃花豔
郎意休隨柳絮輕
桃花柳絮春風急
吹開吹落無人拾
妾容正好對春風
妾意還須惜春日
憶昔兒時未嫁人
青春白日掩朱門
當時不耐金鑪冷
今日翻嫌繡帳溫
繡帳

沈沈風不動。春宵又作揚州夢。跨鶴誰知妾念深。乘龍
但覺郎恩重。念深恩重兩難分。夜夜家山似白雲。百媚
何須憐翠黛。一生真似怨紅裙。紅裙翠黛人人妒。春光
安得常如故。倩人妝作鬢雲斜。攬鏡愁將香粉汙。日出
花枝一片飛。傷春無柰思依依。遠貽新織鴛鴦錦。欲爲
郎裁金縷衣。

送彭欽之北遊太學

驪歌一曲渡河梁。落木蕭蕭雁幾行。駿去正逢燕市價。
劍分仍射斗牛光。三都作賦應無敵。六館談經早擅場。
惆悵離筵人去後。風流誰復似彭郎。

織錦詞

燈橫機畔月當窗。忽憶行人未渡江。織出鴛鴦纔一半。
待郎歸日始成雙。

題徐文貞公吳峯越隴卷

相國功高不可論。直將赤手豎乾坤。百蠻遵道來重譯。
九鼎新安屬片言。龍臥滄江堅晚節。鶴歸華表識精魂。
騎箕應許生天去。莫恨松楸傍墓門。

功成夢落五湖長。高謝人間二十霜。劍履千年垂燕翼。
絲綸五色閃龍光。哀深黃鳥空秦國。歸去青山近越王。
哭斷寒煙渾不省。鳥啼風急暮雲涼。

夏日有懷

憶昔與君遇寒江。楓葉秋今日念君處。獨坐南薰樓。盈
盈祇一水。一水幾百里。隔歲艱綢繆。參商竟若此。燕歸
復雁來。芳訊一何乖。坐令樽酒寂。閒卻山花開。鳳凰山
頭雲。鴛鴦湖上月。相望不相親。相思詎能歇。

登縹緲峯

指點諸峯裏。依稀谷口蹤。津連源水隔。境絕嶺雲封。習
靜依蕭寺。探奇信短筇。不知秋雨外。何處響疎鐘。

從昭慶過湖上

行盡城邊寺。重登湖上船。鳥飛霧散。魚躍浪花圓。林

麓來鐘磬樓臺泛管絃。可知人世內，別自有壺天。

題畫扇

水邊楊柳態輕柔。岸疊青山翠欲流。風色晚來殊未定，何如此處一維舟。

對鏡

把鏡驚看病後容。蕭蕭青鬢拂秋風。頻年毳毼吳趨市，燕冀雲山夢寐中。

輓怡春弟哀辭

月明中夜兮飛清霜。孤猿叫樹兮摧肝腸。嗟予弟兮爾歸何方。爾有父兮誰顯揚。爾有室兮泣孤凰。爾有衣冠

分何形蛻而魂翔。有才宜展兮為善宜昌。人琴兮俱亡。

冀似續兮紹青箱。恨天道之昧昧兮。更泉路之茫茫。援

寸管而攄詞兮。心惻愴而不成章。怡春公諱士俊字子碩華亭縣庠生父春

江公諱籛明萬歷丁丑歲貢南直松江府訓導敬附記於此

題畫

一桁青山古渡頭。短蓑漁子坐扁舟。荒邨五月涼如水。

茅屋扶疎萬樹秋。

送友之金陵

兩地三春草。相思千里愁。君方遊遠道。誰與共孤舟。夜

雨連瓜步。春潮滿石頭。況當絲管地。走馬莫淹留。

江深五月草
因寒樹心愁
此境可以却暑

唐句

弔孫太初墓

當年江海得詩名。潮上扁舟一葉輕。自有高蹤出寥廓。
不妨長揖傲公卿。雄文筆底寒星落。孤劍牀頭夜雨鳴。
八極神遊何處是。徒令山鬼泣元精。

遜齋公小傳

公諱士遷字遜齋北溪公支十二世孫父長湖先生
諱朝笏明嘉靖壬子科應天舉人仇志稱其負才遠
志臨歿涕淚誦孔明出師未捷句聞者蓋憐傷焉王
孝廉文祿誄曰孝恭先生公以國子生供奉授武英
殿內閣中書客閩最久著閩遊集分建州綏安莆陽
清漳溫陵并續刻爲六卷今棲真觀凌州道士處尙
藏鐫本李上舍映台弄重遊草若干卷道光丁亥同
人擬葺杏花樓故址爲崇雅祠祀王文成公旁祔邑
中詩人無後者公數
傳而絕主亦列入焉

上副憲甘公

閩嶠春深歲序更。羣黎願愜駐前旌。敢期薦鶚因知福。
自喜登龍早識荆。明月懷中寒未掩。白虹匣裏氣還呈。
雲泥緣合非容易。私幸銜恩慰畢生。
曾從石室賦長楊。驄馬行辭碎錦坊。百越傳經飛絳節。
七閩司計藹青陽。握來丹筆仍濡露。坐領薇垣亦帶霜。
佇望蘭臺入黃閣。九天霖雨澤遐方。

贈建安仙握如明府

製錦湘江事共傳。辰山花裏又鳴絃。三年績奏魯恭異。
百里才羈陶令賢。鵲喜讓他人待漏。鳧飛容我吏稱仙。

休嫌蹤迹飄零久。早晚鸞書下日邊。

贈建寧項明府

官

鳴琴聲裏過濉陽。河潤傳聞自帝鄉。四野春明花似錦。
一簾秋色月如霜。才高染翰題鸚鵡。政就馳名擬鳳凰。
碧水丹山翹首望。五雲咫尺見飛揚。

贈別吳山人

知君筇迹滿湖山。憶昨元亭載酒還。把盞清風來綺席。
題詩華月徹銀灣。晤言一日聯支謝。揚挖千秋繼馬班。
別去天涯期會杳。驪歌愁聽到陽關。

將之武夷柬吳參藩生白

矯首仙山道未迂。憑將雙屐出名區。訂交誰下陳蕃榻。
舉武都成阮籍途。羞向齊竿誇鼓瑟。愧從郢雪論操觚。
枌榆屈指欽高誼。青眼於今定有無。

元日

異地逢元日。通宵爆竹聲。柏醺朋輩酒。椒慰故園情。客
裏青陽轉。愁中白髮生。歟音渾不辨。彷彿囀春鶯。

禾郡司理沈使君讀禮家居奉慰

隨車甘澤漲春波。棠蔭偏留醉里多。薊北遙瞻紅日迴。
漳南其柰白雲多。鶯聲細雨栽桃李。鶴馭秋風廢蓼莪。
小兒鼎延強進一。饅期自愛玉墀班。裏待鳴珂。

小兒鼎延

君門下士強進一饅期自愛玉墀班裏待鳴珂

葵愚公小傳

公諱學忠字仲顯號葵愚可三公支十二世孫明萬
歷辛卯科舉人湖廣衡州府耒陽縣知縣均里甲平
徭賦俗無女工公教以織紵民間始有布帛去任後
邑人思其德耐主龐士元祠配饗焉升山西平陽府
絳州知州以法繩強藩強藩將中以危法解組歸置
義田以贍族厚施於貧交壽八十有七歲詳邑志循
吏傳詩存循
默公橐中

題循默姪如意圖

惟孝與友名不驚虛歡然無間此意自如
窮理盡性自慊於心功名不顯古人知音

穉毀公小傳

公諱學章字穉毀一作翰廷瑞公支十二世孫庠生
明季張太史溥等創立復社公亦與焉崇禎間薦舉

德行草萬言書將上之會淮安武舉陳啟新以上書
授給事中恐蹈口舌干進乃止詳郡志文苑傳德優
性介遇人有不當意事折以禮法輕俊之士見必趨
避闖亂後填中心醉詞數十闕悲歌痛哭焚青衫明
倫堂上隱居終老鄉人私謚節隱先生著讀書堂集
三世單承曾孫欽惕孤貧不娶客死平湖遺橐散失
續明人詩鈔就舊時傳誦者錄入兩首李氏家
乘刻入一首彙鈔如左無後擬附主崇雅祠焉

燕燕謠

此首寓意有
之可指感悵係

燕燕飛春風二月來秋風八月歸燕在江南燕如寄燕
燕那復知較計黃雀入門銜環報恩燕怕雀來入燕室
鼓翼華堂驅雀出雀去遠方燕獨處堂堂傾棟折燕啄
矢天家一葉輕如紙銜出紅箋唱燕子

有感

倚樓長望霧如蒸。荆棘銅駝感不勝。朋舊關心霜後草。
興亡彈指雨中燈。笑他畫筆空名虎。終恨臨池誤點蠅。
賸水殘山描不盡。探幽須共入林僧。

餓死歌爲李敬田賦

餓死嘯歌臺。曾聞蠡縣客。相逢孫徵君。題字表永宅。吾
鄉近當湖。又聞李天植。窮餓龍湫山。守節志不易。敬田
爾何爲。饗餼棄朝夕。保茲不二心。一死以報國。采薇有
古風。埋骨血尤碧。非爲黔敖呼。不受嗟來食。

鹿巖公小傳

公諱憲字常伯號鹿巖龍沙公支十二世孫廩生三
徵鄉飲介賓工詩詞入郡邑志文苑傳吳明經東發

續澈浦詩話云吾家有朱鹿巖詩文遺藁數紙詩多
詠物中題劉西城像一詩獨警策落句云伊州涼州
唱未徹肝腸寸斷聲鳴咽蕭蕭白楊江月孤魂兮欲
出心紆結初未識鹿巖為後讀家克軒贈鹿巖九
十詩乃知係吾里長者何先生商隱無子卒後薄田
數畝為人所估稜婦無所依鹿巖生平未至縣治至
是躬率里人白之官克軒所謂慷慨陳辭忘謗吃也
又云惟翁與物無町畦眼明脚健肝膽揭前年鄉飲
辭有司鍵關杜轍若避蠅蓋紀實也今訪諸明經後
人悉遺藁已佚張上舍敦善於所藏景福初編中鈔
付一律族叔謙受從萍緣集刻本內鈔寄一首因彙
纂焉○按克軒諱晞淵中丞公孫志仁先生子何先
生商隱諱汝霖錢太常公四世孫復姓何元名何青
庠生世稱紫雲先生著彭城志紫雲詩文藁七卷現
藏其族孫衍
石給諫處

壽張薇山六秩

諱節字叔安給諫公兄弟行

霓裳坐詠大羅天那識人寰別有仙華屋承家榮白馬

蓬廬閉戶守青甌。陶潛菊釀延齡酒。陸羽茶分介壽筵。
秋九自深珠露湛。醉餘齊讀白雲篇。

和慧清上人住縣錫菴元韻

雲稠松密竹斑斑。海國塗紆靜掩關。面壁早欽魔避席。
建幢應許祖開山。目空四大羞顰刮。頭點千峯化石頑。
只此精廬堪駐錫。虎溪咫尺在人寰。

循默公小傳

公諱茂明字伯遠號循默可六公支十三世孫廩生
公年舞象卽稱孝友冠軍諸生父勵南公病風浹歲
躬抱走吳越求異人瘳之母疽背洒淚告天舌錫得
無恙學使旌其廬士之從學者必訓以先德行後文
學好行善而力勿克死喪急難每洗其脩脯周之大
司空杜公士全令海鹽標舉十雋後先成名進士名

孝廉而公獨窮死死之日以不獲終養為恨命無受
 賻贈累我生平遵遺言含殮世咸哀之學者私謚誠
 孝先生明崇禎戊寅崇祀鄉賢祠詳郡志儒林傳著
 自怡悅詩草五卷又怒翼草未見目存庠生族叔豐
 所藏
 書目

自題如意圖

觀化以忘情。惜陰以勤事。置身富貴中。誰能知此義。此
 義不復知。沾沾求名利。一旦遂所求。巍然擁高位。問其
 何設施。亦或勉撫字。勞勞意不如。反覺苦吾志。孰若安
 貧子。名利盡捐棄。嗟我無長物。如意為大器。嗟我無知
 心。如意為同類。手中可以持。愛之常自戲。我意本自如。
 得此更縱恣。祖宗百年遺。早若有位置。繪成我圖形。寫

出我詩思如意如意我意深但願世世子孫如我意

曹娥江懷古

曹江有古蹟孝女今何之芳齡十有四氣節勝男兒潔
身赴水死精靈常在茲古釵蝕碧浪新月映黛眉濤聲
怒號起隔岸猿啼悲鳥篆想髣髴百尺鐫崇碑才人會
心遠始知絕妙辭溧陽刊銘記清潔無瑕疵高愍傳貞
烈激切有操持比之曹江女白壁連雙規溪毛薦淑魄
松楹瞻芳祠嗟余來行役涕洟蓼莪詩

秋風吟

秋風起長相思江楓葉落烏淒其應知孤帆冷歸客何

遊子吟此詩
當潛然淚下

畫境

遲遲山有豺狼水有蛟螭傷心遊子長天涯奉我堂上
親顧茲懷中兒飢無食寒無衣鬱鬱當告誰撫膺長歎
息不怨飢寒怨別離蓬爲矢桑爲弧男兒志氣總不移
吁嗟乎蘇秦金盡裘敝時爭如百里炊糜糜秋風起長
相思

春日吟

芳草萋萋送馬蹄扁舟閒傍綠楊堤雲霞散處都成綺
煙火人家夕照低

柳眼

楊柳伴郵莊行人恨更長雨絲垂幾縷清淚落池塘

宿山寺

小憩禪林裏。悠然俗慮捐。病僧疑鶴瘦。野客任鷗便。山
靜鐘聲迴。波迴塔影圓。忽聞孤鳥語。啼破隔溪煙。

秋暮西郊晚步

信步出西郊。斜陽挂樹梢。小帘邨店颺。清磬寺樓敲。漁
網收橋口。淺船宿水坳。秋光隨處好。相賞少知交。

夜坐有作

牢落仍如此。閒愁入夜深。朔風侵短鬢。明月淡孤心。壯
志空看劍。長歌欲碎琴。蕭然苦不寐。有感託高吟。

家居書懷

大會堂詩金 卷一
三
老去幽懷託雅音。家貧無事且彈琴。一帆滄海曾經眼。
兩屐名山獨賞心。腹儉愧無餘墨漬。情閒時有好詩吟。
春風入檻如相識。靜向庭前感不禁。

客中感懷

回首東園樂意深。天涯迢遞少鄉音。書窗無事焚香坐。
客館多愁索酒斟。夢斷關山千里月。寒催木葉萬家砧。
憑闌獨有會心處。閒看飛鴻過碧岑。

自歎

平生喫得此酸辛。臨事方知閱歷真。種竹常教補屋破。
買書豈肯計家貧。滿窗風雨秋偏急。一榻管絃夜獨親。

按索枯腸詩味淡聊將此意謝同人

白岳公小傳

官

公諱泰禎字道子號白岳三峯公支十三世孫明萬
 厯丙辰科聯捷進士知福建龍巖縣催徵省刑治水
 賑饑皆著政績調漳浦昭雪奇冤士民德之構生祠
 白鶴嶺天啟壬戌行取授福建道御史疏陳籌邊五
 策及鄒滕榆關便宜皆國家大計甲子巡按雲南時
 黔寇梗道公請開建昌發蜀中兵踰大小丞相嶺絕
 金沙江擒首逆烏利道始通賊復合水藺烏之眾攻
 滇公預知之城霑益炎方以待賊不能克謀犯省會
 公出奇兵橫擊賊驚潰擒竜戈資斬之築懷德畏威
 招攜來遠四城樹京觀而勒之銘時魏璫用事外吏
 有邊功必推帷幄之謀於宦寺乃得敘績公上疏直
 陳無所關白且有謀建逆祠者公正色拒之故抑功
 不錄丙寅復命中途聞訃奔歸哀毀盡禮崇禎己巳
 服闋還朝適都城戒嚴任守廣寧門登陴捍禦頭須
 爲白隨拜南京畿刷卷以他事謫官擢南京兵部車
 駕司主事時思陵方欲大用借公已遽遊道山矣崇

祀鄉賢忠義兩祠詳郡志武功傳著佐對軒皆山閣
遠人樓巡滇紀行輿謳錄賡歌錄選入朱太史彝尊
明詩綜沈大令季友樵
李詩繫續明人詩鈔

閔會泉中丞集西爽樓會議霑益師期

綺閣俯層城。西郊眾嶺平。隴頭霜草碧。川上夕陽明。竹
報迎年意。歌傳舊國聲。夜郎飛赤羽。行矣慎佳兵。

立春日邀藩臬羣公同閩帥夜集

采仗青門入。椒圖柏府縣。臘隨銀燭換。春與絳花然。麗
藻雄三事。方猷足四筵。清歡深自慰。除日逼歸年。

人日宮詞

翦刀春色逐人來。采燕雙棲韎鞞鞞。鬪草湘蓑閒自畫。

踏青羅襪賜新裁

天竺老人馬明道充康陵朝貢使久客中華年百四十渥丹修頰弈弈塵外因與談餌黃精之術時

謁予北上

書

駐顏天竺使。來自武皇年。重譯龍媒貢。歸程鶴背愆。六朝稱小歇。孤笠且隨緣。魏闕真人氣。青陽何處邊。

立夏後三日臨陽閱武是日晴雨不常

百二雄關晝漏頻。瀟江如帶繞城闐。殷雷夾陣靈鼉遠。零雨霑營宿霧屯。不爲瑀戈搗晚日。卻因射柳放新晴。須臾雲上開需宴。帝澤仍披塞草春。

六日蒲觴餞太函謝方伯視師曲交同楊霞標學

使席間賦別

元戎十乘啟先行。漉酒菖華雜杜蘅。聞道謝家閒賭聖。
古來方岳重專征。欃槍夜識妖氛淨。籌筆朝看赤羽輕。
淝水於今鐘鼎盛。東山遙繫薜蘿情。

初度日瞻華樓卽事漫賦

去年今日灑西頭。子美谿橋一泛舟。良馬五之蓬矢六。
巴東雨涉疑乘流。欲自瞿塘灑瀕上。魚鳧峽路愁金牛。
愁水愁風忽如昨。今年此日瞻華樓。瞻華樓中復何有。
太華點點浮青邱。窗中遠岫夾明鏡。昆明清淺止且柔。

每每避人書諫草。有時擊節珊瑚鉤。邇來三月邊塵暗。
封狐九首霑烏酋。江東無面歸可渡。重來蟻聚多氈裘。
句連水藺三十部。兼旬暑雨相咻留。我師犀甲二萬騎。
橫驅象陣如脫鞴。乍苦徵兵今苦餉。食貧口眾無良謀。
左伯行邊歌十乘。右伯飛芻勞前籌。衡文治賦諸大吏。
鑄山匡糴脩戈矛。中丞縣金購讐首。萬家之邑官通侯。
一壺中流千金值。良於未雨先綢繆。童童予髮忽披耳。
君恩玉劍何時酬。天竺老人爲予笑。遠猷辰告從相求。
北山有賦未成寄孤雲。海畔空夷猶聊借瞻華暫籌筆。
捷書奚待承明秋。

起句与一山紅
樹一溪雲同妙

沐乾鑑黔國昆明池作水檻同閔曾泉中丞燕集
萬頃蒹葭萬樹煙幾番風雨夕陽前筵飛極浦宜延露
拍按停雲溼采蓮節鎮雄談秋水至中丞雅詠石湖偏
火城初漏傳呼急西堰花津問釣船

六月廿九日同閔曾泉中丞登城闕水撫慰菑氓
鈴閣初聞裂帛聲壓牀風雨欲三更沿堤拍浪憑誰捍
暴策搗門暗自驚樹杪艤船天馬廐鼉鳴沈竈伏波營
應憐萬眾臨江立隔水燈呼稚子擎

玉壺天

九曲疑無縫丹樓玉一痕有根分月窟無地宿雲根巖

戶窺駒隙塵聲隔遠邨。重昏貪慧照。聊飲一瘦尊。

崇聖寺三塔周育王舊建

羽獵回城南。籃輿恣幽眺。使君林壑心。倚樹共舒嘯。松
關一百二。峯峯盡孤峭。煙樓十五六。蔽虧隱晴曜。三塔
峙巍然。鐘動銜返照。層攀無量壽。還憶化成突。徧歷法
中空。方思俗難療。班坐依遠流。帆駛前羅鷁。猿聲天上
哀。人歸月邊嶠。朱旂北斗殷。一寺遠山燒。僧房茯苓粥。
匡牀芋魁鉞。微窺般若緣。彌知靜者妙。

令回公小傳

公諱祖昌字令回庠生三峯公支十三世孫著玉蝶
菴稟選刻鹽邑藝文編構李詩繫集藏族叔謙受家

廣陵道中卽事

西風雁影度邗溝。露冷蒹葭水國秋。二十四橋何處是。玉簫愁聽倚紅樓。

野步

淒風苦縮鄰。試步自今朝。殘雪當晴樹。平沙落午潮。心隨鷗共夢。吟惜草俱凋。未飽遐觀意。紅塵已覺遙。

秋柳

搖曳長條不似初。金風纔起忽蕭疎。情如漢浦看猶昨。人別章臺事已虛。往態可因青眼盡。新愁空憶翠眉舒。倘經南市重相向。惆悵春陰駐小車。

荊州懷古

南紀州雄禹服來。楚宮沒盡市闌開。山當宋玉千秋宅。
地想章華百尺臺。雲澤獵殘遺火散。武關人去逐臣哀。
細腰莫謾當時舞。曾化夷陵土似灰。

京口別爾晉

汗漫風塵際。能無嗟暗投。君畱何不可。我去未能謀。綺
月揚州夢。烟波楚客愁。遙思行樂處。歌管及新秋。
十日孤舟話。茫茫更百端。去當無雁處。愁逐聽猿殘。久
謝濃華夢。猶餘結俠歡。乾坤共肝膽。忍淚向清瀾。

大彰公小傳

公諱廷珪字孟彝號大彰可六公支十四世孫寧邑廩生甲申之變謝儒冠與高人逸士結社倡和人或物色之輒匿影勿見臨終賦詩云百年詩酒畱天地一壑烟霞老此身既卒彭羿仁先生輓之云高隱城西遠市闔憂時十載鬢初斑逃名共結林中社索句長尋海上山翳葉虎頭癡更絕種梅和靖老同閒人間萬事都應了惟有詩逋未盡還其為人可畧見矣詳郡志文苑傳邑志隱逸傳著正氣梅癡槩亭等集選入續明人詩鈔

九日友人攜尊邀至海上登眺有作

海天寥廓任高歌。九日登臨載酒過。隱隱遙山青不斷。蕭蕭短鬢白偏多。枯浮綠蟻侵籬菊。浪湧銀蟾照石蘿。醉後長吟秋色裏。楓林墮葉冷滄波。

答友

何處堪留百歲身。直須沈醉臥花茵。駐顏豈藉青精飯。
憶舊偏憐白社人。壁上畫龍終是假。山中調鶴不難馴。
樊籠滿地誰能解。醉倒籬邊自出塵。

長白公小傳

書

公諱廷璋字如日號長白可六公支十四世孫明崇禎丙子科舉人公生而穎異髫髻善屬文痛父循默公積學未遇齋志以歿刻勵攻苦冀慰先人未竟之志弟虞華公入郡庠垂淚勉之曰吾與汝徒博一衿先人在地下猶飲恨也宜發憤讀書迨丙子捷音至以父不及見號痛不已兩上公車不得志時四方多故遂退隱與二三知己結社唱和甲申之變欲自刎子劍光公跪請曰捐軀殉國分也柰祖母垂白兩弟幼弱何父死兒不能獨生一門滅矣公勉順其情然感憤成疾閱數月竟卒公之一生殆忠孝兩全者與著長白閒吟草五卷

敬題先嚴如意圖 并序

先高祖可六公有如意一柄傳至先嚴愛不釋手
倩人繪圖卽以此命題今先嚴棄養十餘年矣
敬展斯圖彷彿如生迺知源遠流長寓意爲甚
深也謹賦七古一首以誌感慨

君不見富商巨賈權金銀厚貲坐擁徒勞神
又不見服冕乘軒誇顯達高官偶擢難全真
營營富貴不如意孰若樂道安其貧
我父生平無所嗜手澤長存一如意倩
人繪圖寓深情百年以後見高致猶憶當前著書時
安排几案得位置吁嗟乎吾曹兢兢守父書毋使泉途意

不如

琴臺懷古

伯牙琴曲誰能知。不意相逢鍾子期。馬嘒城外一經過。高風終古令人思。有時所志在流水。大海波濤湧十指。有時所志在高山。九峯蒼翠遙躋攀。臺上誰爲後塵步。聞琴橋畔心傾慕。漁歌唱徹蘆花洲。鶴頸塘前頻回顧。

雲岫

直上雲深處。盤紆石徑斜。迴峯低夕照。峭壁斷殘霞。夜月依寒渚。秋林宿暮雅。尋僧時一至。山路細穿蛇。

寒夜

通首佳

秋老起重陰。寒光入晚林。一燈參兀坐。五夜發長吟。歲月閒中惜。雲山夢裏尋。宵深人靜聽。何處擣清砧。

遠行懷友人

作客經年久。寒梅發幾枝。故人一爲別。今夕此相思。兩地樹雲隔。三秋風雨吹。天涯悵不見。日暮欲何之。

過縉雲

邑小無城郭。人家半掩扉。瀑飛疑雨濺。嶂疊若屏圍。野澗沈蒼靄。斜陽淡翠微。仙都何處是。凝望正依依。

金陀園卽景

構李城邊古迹崇。當年文物有誰同。岳家書史千秋重。

宋室江山半壁空。看徧花飛斜徑裏。聽來鳥語夕陽中。
倦翁遺圃今猶在。好景依然向晚風。

寒窗感懷

霜落川原秋氣深。涼風蕭瑟入寒林。晚來愛寫江楓影。
夜迴愁聽山鳥音。病裏吟詩支瘦骨。醉中看月洗清心。
年來疎嬾人誰解。對鏡何堪白髮侵。

九日寄懷吳接侯同年

歷盡窮途費苦辛。頻年奔走擾風塵。友朋離索爲孤客。
兄弟登高少一人。白髮數莖秋後老。青燈半點夢中親。
每逢佳節思桑梓。回首家山景物新。

孤山懷古

處士隱孤山。孤山俯水灣。至今梅樹下。猶見鶴飛還。

病中感懷

一病何堪力不支。寢牀猶自寫吟詩。茫茫天地無終極。吾意難教世俗知。

功名小就志猶存。世故紛紛不可論。嗟我生平無善事。

祇畱詩卷付兒孫。先嚴於亂故後感憤成疾辭世前三日枕上口占命錄稟後男龍鏗謹識

虞華公小傳

公諱廷瑞字虞華可六
公支十四世孫庠生

題長白伯兄看劍圖

君不見漢皇隻手提三尺閃閃精光輝大澤腰間鹿盧
忽一鳴斬蛇當道驚行客又不見楚王命收茨山鐵百
鍊千錘精選擇晉鄭不得圍以師登城一麾頭盡白男
兒有志銳如鋒淬以清波礪以石不問龍泉與大阿冲
霄氣紫波搖碧羨君斫地寄雄心舉栝不引情亦適良
工拂拭會有時莫漫哀歌蕩魂魄

茲邁公小傳

公諱德培字茲邁北溪公支十六世孫性好吟詠亂
後隱鄉舍種竹數千竿嘯傲其中詩成輒刻竹上名
西園刻竹吟幽思綺語都有興寄讀者可以得其性
情子水臣公諱廷錫家乘載有景山樓詩集今未見
孫曾繼起皆以詩學世
其家集選續明人詩鈔

橫塘詞

妾家住橫塘。不出橫塘裏。橫塘花落時。含情對流水。

長水詞

妾恨遠人遠。安知長水長。輕帆無處泊。祇恐到斜陽。

秦溪詞

獨坐秦溪上。月挂秦溪柳。莫以秦時月。照出秦溪口。

春感

捎蝶花枝弱。飛花柳態愁。春風苦無力。何事度江南。

男履泰 和伯 校字

胥溪朱氏文會堂詩鈔卷二目錄

尚胥里派第二十世孫美鏐謹纂

迦陵公一首

秋嵐公二十九首

西野公三首

書雅師公一首

佶閑公一首

樹菴公十四首

劍光公五首

佩相公五首

素菴公四首

羽青公一首

揆臣公一首

汪千公二首

能菴公一首

公似公四首

若垂公一首

友韓公一首

益三公一首

松州公四首

永齋公一首

存齋公七首

衡山公一首

西亭公一首

浙江圖書館

胥溪朱氏文會堂詩鈔卷二

尚胥里派第二十世孫美鏐謹纂

迦陵公小傳

公諱宗文字迦陵廷瑞公支十三世孫性倜儻具才幹邑胥多派糧額公發其姦眾胥怨之誣陷於獄晝夜誦讀弗輟監司奇之察所由蒙垢狀雪其冤順治戊子科舉人壬辰會試由明通榜選餘杭縣教諭士子愛慕泊先府君任餘杭時將二百年猶稱道勿衰公四傳而絕主擬耐崇雅祠詩藁無存於張庠生開福處得詩一首焉

同白岳兄遊白嶽作

人到靈巖夢自醒
石壇夜半讀仙經
庭無俗客生虛白
洞有寒雲覆杳冥
槲葉翻風通夕籟
桃花流水帶春星

仙句

三姑五老遙相待 明日芙蓉天際青

秋嵐公小傳

公諱觀賓字道菴號秋嵐廷瑞公支十三世孫順治
 己丑充纂修貢出吳秋圃中丞門得濂洛淵源著書
 等身尤善史才撰及闕編詳載勝國遺事簡嚴得中
 傳信來茲為邑令郭公誠之所賞白諸巡按趙公端
 趙公聞於朝已丑奉部文調充明史纂修書未竣
 先回因悼亡不克再往格於議敘人皆惜之作文磊
 落有奇氣與胡孝轅吳仲木項孔彰查伊璜彭羽仁
 羨門張螺浮諸先生結社倡和故尤善於詩著客星
 龕長思草秋蛩音和陶竹隱疎放亭澤畔吟蓬廬淚
 聲殘江淮紀遊江山幻夢各集繕藏鷹窠頂雲岫菴
 藏經閣廩生族祖奕煌分類彙鈔公集兩冊已失其
 一因卽所存者選錄如干首無嗣擬附主崇雅祠焉
 ○充纂修貢注按是年鹽邑纂修充貢四人家乘作
 拔貢福業禪院額亦有己丑拔貢圖章邑乘另列纂
 修貢姑闕
 疑以俟攷

龍湫山訪潛夫先生

名山意嘗蓄。靜者貽真音。神交七八載。久虛一寸心。先生柱石望。投冠娛書琴。耕鑿豈不勞。適意從皋林。而我撥雲權。來涉龍湫岑。潭水自清淺。春風自披襟。浩蕩入我懷。杳廓多幽尋。空巖少行迹。誰爲辨古今。

陰風齧人

痛懷廟也

效白樂天新樂府五首錄二首

陰風齧人野鬼泣。黑氛萬里黃雲溼。天子含冤訴帝庭。七萬殘骸白晝立。月羅襖子白綾衫。誓死社稷無艱難。惟有東朝共聖母。同赴大義昭如山。顏舌巖頭今在否。聞得王倪垂不朽。元兇肆虐互古無。舊日名流事逆醜。

血堆千壑燕支江夜深流入聲鏘鏘
按金慘拷酷已盡珠羽翠飾盈筐箱
文臣亡心武亡力結黨奸欺縱蚤賊
聖人遺詔血痕多市路停屍誰歎息
小民莫負聖人思聖人臨難三致詞
襄城小侯身抗節舉朝百職誰如之
聞說前年帝卽位戈聲鐵聲響殿內
十七年來何失恩能無怨彼天公憤
吁嗟宮室盡荒煙燐燐野火明階前
願爲厲鬼斬兇逆安用浮名千古傳

婦莫談 愧降臣也

爲婦莫談節與烈爲男莫論信與忠
古人刻骨勵心志今人僞襲恣奸兇
平時文章誇異采見賊先將百醜逢

無愧乎

不如邨外牧牛子。不如江干垂釣翁。披蓑荷笠明大義。聞說君王悲憤同。割雞市酒向田野。拜君痛君恨不窮。家人嘲笑忽斷頸。天為晝暝生陰風。

太常吳忠節公輓辭書

嗚呼吳公。惟邦之忠。蹟與文異。於心則同。一解山河破碎

身世飄零。人間事業。夢裏緣因。二解生也英靈。死也明決。

睢陽之齒。常山之舌。三解清輝入地。正氣垂天。捐軀殉國。

千古稱賢。四解東海孱國。得公乃隆。虎質龍性。綱常之宗。

五解有子節孝。聲名烈烈。父死痛號。山崩川裂。六解殺身成

仁。周情孔德。何以頌為。惟公之職。七解後死何幸。得教公

門。吾師有言。雖沒猶存。

八解

弔節烈徐碩人

并序

碩人從兄循默公女從父葵愚公愛而字之如
已出爲之相攸焉歸貢生徐乾貞明末避兵豐
山夫他走婢商氏顧氏掖伏林莽中賊劫之誓
不辱遂同遇害

猗與碩人貞且烈。淑媛能辨。呆卿舌。吾頭可斷。罵愈高。
怒奮空拳。懍如鐵。寄奴城外。警狼煙。崎嶇避迹。豐山巔。
扶姑攜子。艱苦備。夜深淚滴。枯楊邊。自矢兵來。拌一死。
高堂無恙。願亦止。白刃叢中。扶病行。失羣鳥見。尉羅驚。

高堂無恙心願亦止
貪生難免身含垢。此時節重身爲輕。昔余從父絳州守。
謂女賢能選佳偶。徐陵有子出羣才。新詠玉臺偕白首。
誰料鸞凰中路分。充閭幸有雙麒麟。而遭雖慘大義申。
千載名節於斯存。

代巡王雷臣師按浙采風冠余多士呈謝

海濱網珊瑚。輜軒持玉尺。仰瞻行部帷。競獻夜光璧。賤
子守青氈。攤書等面壁。承命進蕪詞。受知乃逾格。一語
爲品題。千人皆辟易。衡鑒本平空。塵埃蒙拂拭。昂首登
龍門。握衣侍講席。勉之漢與唐。勵以修與軾。欲因一日
知。俾就百年植。嚮往銘此心。銜恩終無極。

憫生篇

有引 順治庚子初度作

余生不辰遭此蹇厄自有生至今浮沈四十載
實無一日快屈指堪傷總一大夢爰溯有生之
初以至見惡之歲賦憫生二十篇用以自傷兼
貽兒輩止取事真意達非所較於詞之工拙幸
有憐憫勿訕笑焉

此可備一核勝
作年譜

夙生造奇孽再世遭塵魔而我一行者偃息南山阿巖
君長艱嗣虔心祝伽陀爰荷空王恩龕燈起煙蘿忽忽
入門來塵寰竟如何家大人祈嗣定光法相適從武林
歸而余誕實記一僧入門尚見燈

光至榻前一
啼便不復憶

母氏夢更異。星墮而有娠。錫予名曰寶。斯意良有因。其
如四十載。蹤迹逐浮塵。回思鞠我恩。慈帟實艱辛。幼慧
憂耗損。長病勞酸呻。俯仰復歔歔。何以有此身。慈親夢
星墮懷

而娠故元名
寶字客星

兩化歸一神。實挺奇異質。弱植飲香名。富貴應無匹。何
以纏坎軻。自少至今日。乃知夙業償。撫心愈戰慄。常恐
朝露晞。有懷誰能悉。

弱年寡人事。好學而深思。開卷希有得。光采燦陸離。子
安屬文歲。謝貞詠詩時。予縱無此慧。執筆心慕之。秋月
照庭樹。春風捲書帷。吟聲達戶外。朱氏有佳兒。六歲有
詩七歲

有詞俱見年譜

操觚事良傅中丞吳公出就童子科良朋遠相訪賢達時欣

遇胡孝叔姚祥訂風雅二仲仲謀仲木堪琢磨白社知交廣絳

惟感恩多時赴瞻社受知李庚生宗師

擇配高士裔賢媛多令哲晨興鄰雞鳴夜紡寒漏徹外

舅肅懿行文章植氣節藉茲模範嚴相我禮無缺傷哉

十三載錦瑟聲淒咽外舅徐清懶翁文行備篤

屠維單闕歲弄璋慶添丁荏苒逾六載仲也試啼聲刼

下所憐女記從吉戊生是時多交知八挺有令名俛仰

杜與韓雄心奮墨兵躡躑霜蹄蹶秋風空悲鳴

先疇少負郭中道遭喪亂游兵踞寓廬子身莫奔竄嚴

君志高蹈隻影辭里閤慈母多病懷日夕啟憂歎瘵妻

攜弱子伶仃愁分散自此典質空黽勉孤城捍嚴君鄉居余捍

孤城遇游兵劫房費至數百金鬻產之耗始此

名場心未灰一編自揣摩采風拔其尤王雷臣師豁如鏡新

磨主文來仙李李庚生師珊瑚已在羅出谷阻鶯遷額溢柰

爾何戊子鄉試薦而未售爰知命途舛慷慨成悲歌

悲歌布中原誤我專吟詠本非郊島懷寫憂偶游泳賦

命實迍邐抱影愁多病數卷星龕吟誰為再行請戊子下第

後書肆刻予集行世

文宗奉新恩。文行擢多士。日余拜憲徵。從事編明史。控

考兩闕秋。拮据費薪水。詎識徒虛名。何處徼青紫。阮公

途窮悲。莊叟瓠落恥。反轡誠非宜。余心終無悔。已丑纂修一案

代巡趙公薦實余拮据竣事不意未具題先反轡遂未得議敘

徵書忽再至。將為賦遠遊。詎識奉倩傷。帷屏黯窮秋。營

營外望祿。切切內顧憂。功名如幻夢。身世等浮漚。稽首

皈磬山。聊以消閒愁。庚寅春部檄至以悼亡不果行遂皈依箬菴問禪師法名行光

喪亡未云既。踐更復踵直。昔遭盤踞空。又遇重抄逼。傷

哉無窮耗。消此有限粒。溝壑固所待。公私殊煎迫。奪志

為蘋蘩。剖剗遂難立。辛卯春繼娶即有踐更之役費幾八百金絲毫不煩堂上憂今後人

無知迷惑仇
怨嗚呼天乎

蘋蘩更誰職。勉焉向扶風。一箋稱快婿。馬怯菴外舅書曰溫嶠稱佳婿

劉延明稱快婿方之道菴固無疑也半子尊婦翁。貧女實名閥。黽勉能御

窮。撫我三子女。視與所生同。幸慰泉下人。而我仍飄蓬。

三兒產壬辰。愛父亦工讀。名安而字恭。英慧前生。免

懷逾三年。慟深喪明哭。嗟予鮮弟。晷族繁身孤。獨三索

子成眾。柰何爾不育。

遜荒幾十載。所居僅一椽。雖為先世業。薄俗任熬煎。晨

出無與語。坐臥擁陳編。課子詒一經。竹隱非逃禪。耽心

關閩學。奮志濂洛篇。江淮有舊識。爰泛五湖船。

壁立何寥廓。骨肉恆乖離。昔賢困貧賤。每為家人疑。至性尚則然。況乃末俗欺。季子位多金。未遇誠足悲。勢利古不免。胡然怪今茲。澄懷大化中。怨尤亦已癡。

悒悒耳忽聾。鬱鬱面復醜。甌釜多生塵。衣敝不掩肘。夜雨夢故人。暮雲思舊友。憤懣而下帷。重向風簷走。赤腳任衝泥。偃蹇形如狗。忽遭按劍嗟。天意何所咎。不堪匏繫重就

督學試以不合例除

吾生慕泉石。至此遂閒適。散髮林皋閒。山谷有安宅。雖

蒙知已衰。浮生等過客。而我千秋期。臨流嘯天碧。素志邱壑

今得遂初志快事也憲長秦克繩先生復以貢服酬纂修勞余亦不顧但後人不廢余集雖死猶生

倏忽悲晨風零落感秋草幻夢四十年覺來已枯槁五
濁苦恆沙六塵盡捐埽萬象一切空乃識乾坤小憫我
有生因歷歷諸煩惱金粟有後身長庚還入抱一笑祛
俗緣榮名乃爲寶

鹿巖叔貽如皋冒嵩少梅花詩扇喜賦

生綃染出徐熙筆千嶺梅花同一色石屋兩三高士眠
盤旋無乃眾香國雉皋先生思復神筆力痿硬埽埃塵
詩中有畫畫中句輞川雙絕堪爲珍歔歔何處得此景
披圖展視心彌靜橫幅攜入小窗前臥遊身在羅浮巔
楊靜山太史撰亡妻徐孝恭紀畧查伊璜盟長書

之長箋攜歸付兒曹珍藏

闔範誰傳述吾為勉乞言以文將壽補此卷合家存地
下心應慰身前德始尊二公皆俊彥世守勝瑤琨

課兩子及從孫銓達鈺於先大父舊書齋

二百餘年地重登舊講堂詩書先澤在吟誦世情忘梅
子黃酣雨藕花紅映塘檐前雛燕語又是一時芳

在三公諱

銓達康熙己酉科武舉隨征耿逆有功擢汀州城守
遊擊加左都督銜湖廣均房營參將事詳郡志繩佑
公諱鈺早卒
敬附識於此

西野公小傳

公諱嘏字西野龍沙公支十三世孫庠生當時有詩
家之稱無後事實失傳道光丁亥四月舟過平湖訪

鮮豔

胡明經昌基讀所輯續構李詩繫錄此二
首又族叔謙受錄寄兩首主擬附崇雅祠

立秋日集拙存堂分賦

客隨秋思到涼意滿庭柯佳會何妨數良朋喜見過風
搖花影亂雲斂月華多卻恨來朝別中宵翦燭歌

集城南別墅懷汪六州晉賢兩昆季

南郊竟日共徘徊佳客風流盡上才醉把深杯忘月轉
涼生細葛愛秋來城頭哀角驚殘夢海底狂瀾激怒雷
翻憶送春曾負約空憐懷抱幾時開

夏日集拙存堂分賦

蒲帆停水閣筍屐啟山扉浮白酒人滿談元俗客稀時

艱甘守拙性懶學忘機。卻憶休文瘦。應知減帶圍。

季夏望夕集玉山草堂分韻

匙滑青精飯。栝香白墮醪。聯吟還促席。射覆復分曹。竹
色涼侵簟。松陰暮捲濤。相看雲海際。飛上月輪高。

雅師公小傳

公諱毓期字雅師龍沙公支十三世孫廩生母彭孺
人工詩與兄增生介子公諱正標均幼稟母教時人
有機雲之譽文行詳
郡志惜遺橐無存

題誠齋姪廬墓詩

一帶平蕪繞綠波。三年築室此巖阿。仰瞻箕尾人天隔。
欲報熊丸歲月多。嶺上采雲連碧草。冢前白鳥噪青蘿。

祇緣孝感呈符瑞不獨吟詩廢蓼莪

誠齋公諱廷采字子鮑庠生三峯公

支十四世孫父節菴公諱泰復庠生明天啟丁卯海塘圯決以凹凸塘法上之當事依議舉行七郡賴以奠安運白糧例點糧長充解富戶因之破家公創官收官解法白諸巡按御史疏聞於朝永著為令并徧下有漕各省民咸便之思陵未公切齒曰吾家世受國恩不能操刀平寇偷生何為甲申懷宗哀詔至自勿死是時公年十五慟哭幾絕既葬廬墓三年母老善病侍奉益摯棄養後復廬墓三年致芝草白鳩諸瑞士夫作詩紀事康熙癸巳年八十四欽賜八品頂帶閱二載卒乾隆丙辰題旌孝行采入郡志敬附識於此

佶閑公小傳

折

公諱鳴珂字佶閑可三公支十四世孫康熙丁巳歲貢生建德縣訓導

壽張薇山六秩

孝友成恩靜掩關。心閒城市即深山。籌添碧海家非遠。帽插紅萸鬢未斑。詩酒自能驅俗累。墳簾並得濟時艱。萊衣舞晉高堂筭。佇看珂鳴玉筍班。

樹菴公小傳

公諱挾鏃字四如號樹菴北溪公支十五世孫順治己丑科聯捷進士知湖廣臨湘縣時署燬於兵公捐俸重建不費民間一錢戶口寥寥招集流亡漸成邨落後以侵蝕舊案名挂彈章甫得昭雪巡按李君又因雲長二驛以人代馬舊事牽連被劾公反覆上書辨論雖詢明事實無辜而羈省半載偕眷屬入口鬻書畫自給復職後抽簪歸隱徜徉秦駐鷹窠間吟詠陶情著蓬壺軒橐詳邑志人物傳詩經李別駕仙根選入馬嘽詩鈔

洪山野飲次袁籜菴太守韻

太守名于令字令昭時為荊州知府

碧映池塘柳色侵。嗟峩佛閣共登臨。山圍青黛詩中畫。
地隔紅塵物外心。水面飛花搖醉眼。枝頭啼鳥喚春陰。
歸來依舊蓬窗底。回首前溪月影沈。

君發弟以詩見贈依韻答之

滿船絲竹五湖春。醉後狂歌泣鬼神。舊有梅花吹鐵笛。
幾經風雨一般新。君發公諱鍾祥庠生大彰
公子詩無存敬附識於此

渡漢江

巖城列峙兩山頭。濁浪排空撼斗牛。萬疊晴川長映閣。
千年黃鶴不歸樓。亭亭嶂影分江夏。葉葉帆檣上沔州。
何處吹來湘水曲。陽臺獨立使人愁。

鸚鵡洲弔禰正平

在昔炎漢當殘葉。平原禰生甚豪俠。凌雲意氣日激昂。
一鸚高鶩稱矯捷。鸚鵡賦傳千載名。迄今藝苑心咸惜。
可憐一命死奸雄。熱血滿腔空化碧。煙波江上白沙堆。
別開州渚當充斥。萋萋芳草綠成茵。傳是英才此中滅。
我行來此正春三。獨立江干候潮汐。時方夜半月初升。
匹練銀濤遙溯澗。市朝遷易悲滄桑。川后獨護靈異蹟。
吁嗟乎禰生夜臺不復來。星光螢火照魂魄。醜酒臨流
心悚然。葦杭不得將奚適。

洪山卽事和籜菴太守韻

時劇西樓記
係太守手撰

幽極

已放鶴飛去。攜琴且自隨。波恬風自靜。曲度拍頻移。臚
有山靈嘯。愁爲俗客知。永懷惟此夕。何意集仙芝。

信陽道中

纔渡黃河陟大岡。籃輿度似鳥迴翔。千峯滴翠凌霄漢。
百道飛泉瀉石梁。徑折生憎前路遠。林深暗逗野花香。
山高何處堪招隱。擬向荒塗結草堂。

冒雨入遂平

瀟瀟風雨溼征鞍。躑躅長途日正闌。咫尺山城知不遠。
暮雲搖曳隔林巒。

雨阻遂城和籜菴太守韻

宛是雨境

文會堂詩金 卷二
三
零雨溟濛滿遂城。曉來愁見客中情。千家煙火遲遲起。
萬疊雲山黯黯平。驛路不堪驅我馬。旗亭祇許駐行旌。
閒時且中前邨酒。一枕松風候午晴。

出西平過管鮑分金處

管鮑當未遇。結契已牢固。持籌既不論。誰與較泉布。非
敢弋虛名。聊以見平素。後世重賄交。此誼安所慕。

確山道上

倉黃曉發確山城。四面烟嵐馬首迎。繞徑松陰行不盡。
幾家茅屋數分明。春流到處添新漲。野鳥隨時自喚名。
最是亂峯凹凸處。吹來樵斧響丁丁。

望廬山

扣舷日日看山色。看盡峯巒幾萬億。獨有匡廬秀且奇。
煙嵐稠疊無榛棘。前臨彭澤形岩巖。後俯江州勢巖巖。
蒼蒼鬱鬱千尋高。絕嶠幽厓杳難測。中喜珠宮紺宇藏。
自求高隱常棲息。九疊屏風列眼前。飛泉瀑布晶簾織。
有時蕩漾曳晴雲。金光閃爍映朝日。江面蒲帆十幅懸。
就中勝槩依稀識。

石鐘山懷古

峩峩石鐘山。端明嘗作記。余少誦其文。翩然有佳致。雖
未作臥遊。躍躍動人意。今年夏五時。蠡水宿舟次。江潑

暫停橈納涼上鐘寺踏磴履巉巖晴嵐橫紫翠忽聞噌
吡聲儼若洪鐘肆徐徐察其中石罅涵怪異微風激浪
來澎湃揚其勢水與石相撞遂有此清吹或又謂茲山
上下共有二昔時蘇公遊歷歷皆親至高文千載傳山
川增婉媚余生多曠懷尋幽耽夙嗜境深人迹稀未能
具軒輊勝情祇自知回首結餘契

夜泊天門山

兩峯相對傍滄江巨浪洪濤任擊撞浪底山根橫鎖鑰
林端樹色護旌幢舟因日落迴荒渚燈爲邨昏炯夜釭
擬覓晚涼垂柳外旋看新月到篷窗

雨後登岳陽樓

百尺危樓俯碧湍。獨來登眺豁心顏。雲凝巴蜀人煙密。
雨洗君山草木閒。負郭水田苗乍秀。沿溪翠竹淚長斑。
憑闌誰識飛行迹。終日狂吟自往還。

劍光公小傳



公諱龍鏗字劍光可六公支十五世孫庠生公父長
白公之卒也含殮時公撫棺慟哭痛絕復甦欲以身
殉親族卽舉公前日謁請父言慰之公亦翻然曰父
死矣一門大事當屬諸余敬領命時兩弟一僅舞象
一尙未離襁褓教養備至有齒及國事者輒流涕謂
先人爲國而死未獲表揚也上侍重慈色養是亟嘗
言持身處世從涵養中得來則心平氣和物我無閒
故子弟之服膺公訓者皆不失爲醇謹之士著守拙
詩草
三卷

烈婦行 并序

烈婦爲先大父循默公女其初生也曾伯祖葵
愚公見而愛之撫如己出爲之擇配歸貢生徐
君乾貞旋遭喪亂盜賊蜂起避難豐山適與兵
遇夫與子失羣遂被執脅以刃飲血而詈不已
賊殺之商顧二婢承劍以殉兵解獲屍草間風
鬢怒髮如生葬之如禮時乙酉八月二十三日
也鏢作詩哭之

男子當効忠婦人貴持節殺身以成仁此身先勇決我
家有賢姑秉質堅如鐵伯祖具巨眼目爲巾幗傑撫養

深閨中愛之常提挈。青年方及笄。作爲徐氏室。于歸婦
職修。舅姑兩愉悅。一朝遇寇兵。舉家道路別。山深淫雨
作。氣壯力已竭。兵刃若秋霜。芙蓉慘欲折。妾心知有夫。
可殺不可褻。奴心知有主。相從淚嗚咽。貞魂挾二鬢。遂
與紅塵絕。兵解獲其骸。風鬟怒衝髮。生死雖異途。夫婦
終同穴。我今弔精魂。生氣不磨滅。一死何足奇。千古爭
此烈。古來小丈夫。須眉映白晢。雙旌六纛中。一命如攘
竊。哀哉我賢姑。汗下不同轍。豐山終古青。高蹤並屹嶮。

春草

池塘香滿處。蝴蝶作團飛。芳艸青如此。王孫竟不歸。

雪後看山

杖策來山徑。閒看落葉紛。晴飛千片雪。寒入萬重雲。展
齒印苔冷。鐘聲隔嶺聞。還家有餘興。沽酒喜微醺。

旅懷

歷盡窮途苦。周知入世難。星霜雙鬢老。風雨一燈寒。愧
我青雲陞。逢人白眼看。旅懷誰解得。歎息事多端。

秋夜感懷

風波世事任瀾翻。窺破窮通得道根。窗外竹喧風滿徑。
庭前花靜月當門。胡琴每為悲歌碎。越劍時看壯志存。
昂首青天五夜望。此身常願脫籬藩。

窗外一聯可悟
道根

練句

佩湘公小傳

公諱與蘭字佩湘三峯公支十五世孫恩貢
生候選州同知著筆讀齋詩鈔存族叔謙受家

將至都門

策馬初從輦轂過喜看風景壯山河日輝瀛海臨丹闕
虹飲蘆溝撼碧波東去浮雲瓊島盡西來王氣太行多
中逵九達車書盛天保相將聽雅歌

送徐青巖丈還鳳林

別路一聯佳
西風古渡送仙槎一水遙通高士家別路秋來生碧艸
故園歸去正黃花匣中劍動鳴溪月帆外烟消見海霞
舒嘯東皋今未晚應憐知己賦蒹葭

練

佳句

贈京口李彙生守戎

西隴來名胄。南徐擁上游。符分京口鎮。鞭畫大江流。甲
白量沙夜。風高牧馬秋。建牙多勇畧。誰與策奇謀。

酬李季奔次元韻

憑遠舒高嘯。瞻言守素家。萬山飛木葉。一水放蘆花。離
夢驚秋杵。相思寄晚霞。故人多契闊。愁聽咽悲笳。

歸舟值雨

舟行縈郭外。小雨暗斜曛。澤國陰初合。江天望不分。孤
帆驚雁陣。短楫愜鷗羣。客路空濛裏。歸攜兩岸雲。

素安公小傳

公諱毓，姓字素安，庠生。三峯公支十五世孫，性質樸
狷介，生長貴胄，無執袴習氣，恂恂儒雅。遠近重之，讀
書過目輒成誦。尤長於詩，著石笋山房集。隨外舅張
螺浮公之荆南，副使任舟覆，橐沈於江，見續圖經文
苑傳。

揚州

隋家宮殿總蕭條，蕪草荒烟又幾朝。
秋苑何時重翦采，夜橋無女更吹簫。
錦帆江上空殘照，楊柳堤邊屬暮樵。

回首翠華行幸處，十年愁絕廣陵潮。

春疇漫興次佩湘兄韻

春水溪頭漲淺沙，柴門寂靜野人家。
雨餘擇地移修竹，睡起憑闌數落花。
怕闌人寰驚岸谷，閒尋郵叟話桑麻。

此乃極樂世界

可勝浩歎

芳菲容易來消歇。杜宇聲中感歲華。

雲棲禪院步彭羿仁舅氏元韻

策杖尋蘭若。崎嶇入萬山。竹侵幽徑綠。石綴古苔斑。疎磬因風出。閒雲伴鶴還。到來飛驟雨。若為洗塵顏。

重九登峽川東山

古木蒼藤繞碧雲。迴盤拾級出氤氳。秋田穰稔千原合。山市人烟一水分。濟勝勉追元度具。解嘲誰續孟嘉文。層岡徙倚懷良友。霜樹迷離落葉紛。

能菴公小傳

公諱士鑄。字能菴。三峯公支十五世孫。廩貢生。候選訓導。素性孝友。多隱德。歲歉煮粥賑飢。旆棺掩骼。修

雲棲多竹侵
徑綠乃紀
實此
實語也

家乘葺宗祠見義必為詳邑志孝義傳與弟汪千公皆以能文稱有二難之目士林皆恃為矜式焉詩藏張上舍敦善攀轅錄

蔡邑侯德政

公諱珣漢軍人多善政邑人建生祠天寧寺西祀焉

旗人康熙間治鹽

歌徧循聲被管絃海隅親見福星懸鳴琴咸頌羣黎德臥轍爭畱令尹賢自布濃恩同黍膏即看仁政繼蒲鞭如何惠我無多日祇賸棠陰遠邇傳

揆臣公小傳

公諱烈字揆臣東溪公支十五世孫廩貢生候選訓導

蔡邑侯德政

律吹寒谷下車時又是鶯啼雨散絲地產魚鹽稱澤國

人從姚魯想風期滄洲絆驥歌來暮霄漢飛鳧繫去思
三月鳴琴成速化感恩敬為立生祠

汪千公小傳

公諱士容字揚菴號汪千三峯公支十五世孫廩貢
生鄞縣訓導教法師古一時宗之門下士邵悌蔣栻
之董正國袁德峻輩最知名陞國子監學錄改安吉
州學正州故僻在山隅無與鄉薦者公至助士敦行
嚮學使各自矜奮於是州士徐炳文始登賢書至今
人文蔚起州人稱道勿衰詳郡志循吏傳邑志人物
傳詩選馬嘯詩
鈔及貽松集

蔡邑侯德政

英年爭識中郎裔賢令聲華到處誇政簡訟庭喧野雀
吏閒官署灌名花舉帷海國纔三月播澤陽春滿萬家

如此則吏亦
稱仙

借寇無由空悵望。夢魂長逐漢臣槎。

送署丞周公擢貴陽臬贊

何曾枳棘有棲鸞。錦翼雲生天路寬。
朱管兼批海上月。綠衣更上剡中巒。
未饒案牘分吟興。爲約梅花共歲寒。
自是風流蓮幕客。春風折柳贈雕鞍。

羽青公小傳

公諱淑文字羽青北溪公支十六世孫附監生考授
州同知事實詳邑志孝義傳康熙丙戌崇祀鄉賢祠

蔡邑侯德政

聯縣門第冠三韓。釋褐年來寄一官。
政績銅標飛瑞雁。澤同白水集祥鸞。
被徵轍效臨淮臥。畱別琴餘單父彈。

望斷慈雲猶佇立。心隨鳧舄到長安。

公似公小傳

公諱澣彥字東明號公似北溪公支十六世孫事母至孝中年喪偶不娶積館穀為甘旨供亂後足迹不入城市以吟詠自娛鄉人私謚曰孝節先生采入郡志孝義傳無子遺女一適庠生于文霄所著閒吟集其手錄也藏族兄昌運家主擬耐崇雅祠

秋感

壯懷同逝水。老大易悲秋。落葉催寒急。砧聲作暮愁。

送友

風雨送行舟。情同逝水流。徒深悵望意。惟見綠窗幽。

病中吟

最惜駒光逝。愁懷易累人。榮枯知有命。生死豈關身。偃
蹇悲三月。呻吟歷一春。窺銅驚瘦影。況是更憐貧。

處困 五仄體

處困憶始有志。慮豈可苟。卽事必合義。遇世務謹厚。唾
面弗自拭。納履聽老叟。境界止獨善。試問是也否。

若垂公小傳

公諱汝翼字若垂北溪公
支十六世孫詩附閒吟集

祝公似二兄六旬壽

喜臻花甲望耆年。避俗離塵出自然。節義未經青史誌。
聲名克紹紫陽傳。性甘淡泊非云癖。情愛空虛豈是禪。

黃菊笑簪雙鬢畔。滿斟芳醞介堂前。

友韓公小傳

公諱泰來字友韓北溪公支十六世孫詩附閒吟集

題公似兄齋壁

結構成茅舍。新篁已出籬。遠山濃翠集。高樹宿雅飛。墮
意栽瓜果。傷心賦薜薇。功名時已謝。裘馬任輕肥。

益三公小傳

公諱冲字益三三峯公支十六世孫庠生

題從祖誠齋公廬墓詩

婺源分派到胥川。孝子天生繼昔賢。鬚指深情今再見。

居廬異瑞世爭傳。鹿來銜土成邱壟。鳥爲攀花插墓田。
那識餘生惟賸骨。哀哀猶恨隔黃泉。

松州公小傳

公諱永嘉字元眉號松州可六公支十六世孫廩
生康熙丁卯科舉人河南衛輝府新鄉縣知縣

先曾祖循默公如意圖閱百餘載爲屋漏所損紙
尾已霉爛矣今秋校訂公橐並將題圖詩彙錄集
後俾後世子孫讀前哲詩知公之孝友洽於人者
深且以見公之寓意甚遠也敬賦七絕四首時康
熙甲申八月二日

祖宗手澤至今新。四世相傳畫裏人。愧我子孫無好事

翻教含意未能伸

心地光明似水源音容約畧畫圖存此生雅願常如意

賸有餘情望子孫

閉戶終年好著書研求性理悟清虛平生不為功名擾

此意悠然得自如

瞻拜遺圖見本然蒲團枯坐靜參禪一生孝友垂青史

為報馨香近聖賢

永齋公小傳

公諱肇修字慎思號永齋可六公支十六世孫庠生詩刻入貽松集

送署貳尹周公擢貴陽臬贊

久知鸞鳳異鷹鷂。暫屈賢才百里閒。兩邑薄書難並理。三時兼攝有餘閒。恩膏已沛汾湖曲。功德堪銘金粟山。此去牂牁多勝境。山如文筆水如環。

存齋公小傳

公諱世標字勉菴號存齋可六公支十六世孫庠生公深於詩故公之兄元眉公授以先世遺藁康熙丁亥編勉存詩草一卷是其承先啟後可敬念焉

山行

一路草芊緜。人家傍水邊。穿林逢野鹿。倚樹聽鳴蟬。古木橫山徑。清流瀉石泉。扶筇一眺望。直上翠微巔。

家居有感

山行

存齋公小傳

靜字易寂
字何如

田家樂事

平生無所嗜，惟愛竹千竿。
屋破風來易，林深月到難。
苦吟三徑靜，兀坐一燈寒。
壯志今仍在，宵深把劍看。

田家卽景

欹斜籬落小經營，秋穫農人樂有成。
麴酒每因冬至釀，園蔬常爲客來烹。
晚看野店炊煙景，曉聽鄰家打稻聲。
終夜悽然無所得，推窗閒看月微明。

自歎

自歎家徒四壁畱，寒氈日坐志難酬。
夜深空自鳴長劍，秋到猶然典敝裘。
世事升沈嗟末路，生涯淡泊起新愁。
蕭蕭兩鬢侵余老，身外閒情付白鷗。

春晚漫興

垂老閒居自解嘲。生涯淡泊未曾拋。
草塘水滿蛙鳴鼓。花徑泥香燕補巢。
一榻琴書消永晝。半簾風雨契神交。
悠然終日渾無事。傍晚吟詩尙待敲。

秋興

閒來小立夕陽斜。極目長天樹影遮。
萬壑風聲催木葉。一邨漁火隱蘆花。
詩情病後方知淡。酒債貧時不厭賒。
深閉柴門塵事遠。憑闌獨自數歸雅。

客中感懷

平生擾擾向塵寰。旅館相思淚自潸。
客裏驚逢新歲月。

詩中畫

夢中頻到舊家山。原知四海皆兄弟。誰料連年獨往還。
閱盡世途榮辱態。一身輸與白鷗閒。

衡山公小傳

公諱漳字衡山三峯公支十六世孫

題從祖誠齋公廬墓詩

兩度相依馬鬣封。六番宿草變青蔥。影移苦出茅檐月。
聲助悲號墓木風。瞻望但知同岵岵。馨香何意祀黌宮。
恩衰接踵先臺憲。忠孝祠欣伯姪同。

曾伯祖侍御公雍正丙午詔賜崇

祀忠義祠

西亭公小傳

公諱振滄譜作潢字丹麓號西亭廷瑞公支十六世
孫遷居西安縣族叔謙受藏公手書條幅一所書卽
也公詩

初春至韓明廟水閣野望晚歸

禪關寂寂傍烟霞。小閣紅闌映水斜。
柳眼乍開荒草路。鶯聲喚起舊時花。
靜聞古殿僧鳴磬。坐對深溪客供茶。
興至竟忘歸夜飲。比鄰燈火出窗紗。

浙

浙江圖書館

出嗣男衢康
仲尊
校字

811.108999

25901

262122_25


v1_4



浙江圖書館



浙江圖書館



胥溪朱氏文會堂詩鈔


全函

浙江圖書館





浙江圖書館



Centimetres

TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color Black